

FESTA FEDERALE DA TIR



Il sport da tir, ün sport cha Cornelia Valentin ha cumanzà be per cas, però restada fidela ad el dūrant ils ultims 25 ons.

FOTO MAD

Adüna ils deschers in mira

Trar cul schluppet es ün'importante part i'l temp liber ed üna da las plü grondas paschiuns da la treganta Cornelia Valentin da Cuoira. Perche ch'ella es rivada be per cas pro quist sport e perche ch'ella es listess restada fidela al trar cul schluppet fin al di dad hoz, ha la duonna oriunda da Sent quintà d'incuort in üna Marella da Radiotelevisiun Svizra Rumantscha.

RTR/FMR VALLADER

Il cumün nativ da Sent es quel lö ingio cha tuot ha cumanzà pella treganta cun corp ed orma, Cornelia Valentin, e quai be per cas. «A Sent haja dat avant üna pruna, pruna ons ün nouv Vita Parcours», s'alorda la treganta da 41 ons in üna Marella da Radiotelevisiun Svizra Rumantscha (RTR). E dūrant quistas festivitats d'inauguraziun daiva tanter oter eir la pussibilità da trar cul schluppet dad ajer.

«Là d'eiran ils tregants – ch'eu nu cugnuschaiva amo, insomma neir il sport na. E cun mia collega da scoula eschan no duos its via a trar e vain toc tuottas duos magari bain.» Gnüda sün quai invidada da la Società da tregants Sent da pudair visitar üna jada ün da lur trenamaints, es Cornelia Valentin ida a verer – e restada fidela al sport fin al di dad hoz.

Ün sport chi fascinescha

Il sport da tir pretenda concentrasiun maximala, controlla dal corp e forza mentala, qua-

litats cha Cornelia Valentin ha perfecziunà dūrant divers ons. E ch'eir amo davo 25 ons sajan las algordanzas, las emoziuns e la paschiun pel trar amo adüna uschè preschaintas sco da plü bod, manaja Cornelia Valentin plünavant. Hoz però na plü a Sent, dimpersè in sia nouva patria a Cuoira.

Quia es Cornelia Valentin commembra da la società da tregants a Haldenstein, ingio ch'ella tira sün 300 meters cul schluppet standard e pro'ls tregants da sport a Domat, ingio ch'ella tira sün 50 meters cul caliber pitschen. E gūsta quista disciplina cul caliber pitschen es quella disciplina, illa quala ella as chatta il plü ferm da chasa.

«A mai fascinescha enorm chi's riva da tocker üna schaiibia sün lunga distanza», quinta Cornelia Valentin be fò e flomma, ed agiundscha: «A Sent gniva adüna sajettà be cull'arma da militar. Sch'eu vess cugnuschü fingià plü bod eir otras armas, sco per exaimpel il caliber pitschen, vess üna via professiunala eir pudü esser ün'opziun.»

Tanter cumünanza e concorrenza

Restar fidel ad ün sport eir sainza esser part da la scena professiunala: Per Cornelia Valentin vala il barat cun collegas tregantas e tregants, e la cumünanza in società gūsta uschè bler sco il success sportiv sves. Eir sch'ella guarda s'inclegia gugent inavo sül agens success dal passà. Ed üna concorrenza chi tilla resta impustüt in memoria, es il titel da champiunessa svizra al final dals giuvenils e veterans dal 2004 a Thun. «Eu sun ida giò Thun sainza spettar ün bun resultat. Eu sun simplamaing ida giò, n'ha trat e n'ha guadagnà. Ün bel mumaint, a s'algardar. Uossa n'haja a chasa üna medaglia d'or e divers artichels da gazetta.» E chi sa, forsa cha la prosma medaglia ed artichel in gazetta pudess dvantar bainbod darcheu realtä per la treganta cun corp ed orma, Cornelia Valentin?! Quai dūrant la festa federala da tir chi ha cumanzà quists dis a Cuoira e contuorns, ed adüna ils deschers in mira.

La cumpletta Marella da Cornelia Valentin as poja da tadlar sün rtr.ch obain sün Play RTR.

SAMEDAN

Ad es ura per cultura

In venderdi, ils 12 gün, a las 17.00 evra la Chesa Planta Samedan sias portas per la stagiun da sted. Tenor la comunicaziun a las medias da la Chesa Planta Samedan daro que ün program vario. La schurnalista Isabelle Jaeger do invistas i'l process da sia lavur, da la prüm'ideja a las lavuors da filmer fin al film glivro. L'autur Dumenic Andry ans invida a der ün cuc in sia ufficina da scriver. El prelegia impustüt texts inediues ch'el commentescha cun reflexiuns davart sieu egen scriver. La saireda vain accompagneda musicalmaing da la ghitarrista italoфона Greta Fisler dal Puschlev chi preschainta üna tschernatmosferica dad ouvras baroccas e classicas fin a chanzuns populeras. Il salutd da bivgnaint faun Kaspar Howald, mneder da proget tar Graubünden cultura, ed Annetta Ganzoni, presidenta dal cussagl da la Fundaziun de Planta Samedan. (cdm/fmr)

Infurmaziuns ed annunzchas per e-mail ad info@chesaplanta.ch u per telefon 081 852 12 72.

PUNTRASCHIGNA

Greiv accidaint cun töf

In dumengia zievamezdi ho ün motociclist chaschuno ün accidaint sülla Via dal Bernina H29 tar Puntraschigna. Scu cha la Pulizia chantunela dal Grischun scriva, giaiva ün hom tudas-ch da 69 ans cun üna gruppa da töfs da l'Ospiz da Bernina in direcziun da Puntraschigna. Süll'otezza da Las Plattas ho el vulieu surpasser ün auto, ho però ruot giò la manövrada surpasser ed es collido da la vart cun l'auto. Il motociclist es alura rivo sül viel oppost ed es crudo illa saiv directiva. El s'ho ferieu fermaing. La Rega l'ho svulo in l'Ospidel chantunel a Cuira. Per vi da l'accidaint es la via steda serreda passa ün'ura. La Pulizia chantunela sclarescha l'accidaint. A vegnan tscherchedas persunas chi paun fer indicaziuns davart l'accidaint: 081 257 76 80. (cdm/fmr)



Il motociclist ferieu greivamaing es gnieu svulo culla Rega a Cuira.

FOTO PULIZIA CHANTUNELA

SAVOGNIN

Da la chatscha per la fom a la chatscha da plaschair

Ils 30 da zercladur avra il Museum Regiunal Savognin puspè sias portas per la stagiun 2026/27. Questa giada cun l'exposiziun speziala «ORIGIN & PASSIUN – La tgatscha grischuna an igl decurs digl taimp». In'exposiziun che dat in sguard sin il svilup durant ils ultims 200 onns e che duai il medem mument era promover l'encletga tranter pèr en chaussa chatscha.

DARIO MÜLLER/FMR RG

Mintgamai suenter il sien da Rosaspina tranter Pasca e zercladur sa dasda il Museum Regiunal Savognin puspè cun ina nova exposiziun speziala. Questa stagiun preschenta il museum in'exposiziun davart l'istorgia da la chatscha grischuna cun il titel: «ORIGIN & PASSIUN – La tgatscha grischuna an igl decurs digl taimp».

Chatscha pli baud – chatscha ozendi

«Cura ch'il cumbar cunter la fom marca-va pli baud l'enviern, batta oz il cor per la natira: La chatscha grischuna tranter ierta istorica e passiun moderna.» Cun quests plets ch'èn publitzads sin la pagina d'internet envida il Museum Regiunal Savognin a partir dals 30 da zercladur 2026 visitadras e visitaders da sfundrar en il 19avel tschientaner. Cura che «l'enviern grischun era anc in adversari senza misericordia», e cura «che mintga part da l'animal – dal tgirom fin a la corna – fur-

mava ina resursa custavla per il surviver da la populaziun muntagnarda.»

Questa tematica saja vegnida tschernida en collavuraziun culs dus ulteriurs commembers da fundaziun, Martina Ardüser e Mirco Uffer, fitg intenziunadamain, declera il president, Aaron Bellini envers la FMR. «La chatscha è uschè preschenta en noss chantun, ina chatscha che ha fatg in grond svilup ils ultims 200 onns – cunzunt ils ultims 100 onns – d'ina chatscha oravant tut per la fom ad ina chatscha da plaschair. E da pudair render questa passiun e fascinaziun pli damanaivel ad in public pli vast vegn ad esser ina da nossas finamiras principalas per questa exposiziun speziala.»

Ultra da quai duai l'exposiziun dentant era promover ed encuraschar l'encletga tranter pèr e tranter differentas opiniuns e discussiuns en chaussa chatscha grischuna. Sco per exempel tematicas pertutgant il luf ubain la chatscha supplementara, declera Aaron Bellini plinavant, ch'è dal rest era sez chatschader, u



Bainbaud avra il Museum Regiunal Savognin puspè sias portas, alura cun l'exposiziun speziala: «ORIGIN & PASSIUN – La tgatscha grischuna an igl decurs digl taimp».

FOTO MUSEUM REGIONAL SAVOGNIN

sco ch'el sa descriva «mo in mez chatschader», perquai ch'el saja i plirs onns «mo pli» a chatscha bassa.

In'exposiziun per ina e mintgin

En mintga cas na duai l'exposiziun betg mo attrair persunas che n'èn betg dal

fatg, mabain era chatschadras e chatschaders sez, uschia Aaron Bellini: «Interessant gist per las chatschadras ed ils chatschaders vegn segiramaing ad esser la pussaivladad da vesair co che la chatscha funcziunava ina giada pli baud. Co ch'i gniva fatg chatscha e sut tge cundiziuns ed ordinaziuns. Cun tge utensils, cun tge armas e cun tge vestgadira.»

Midadas zunt fascinantas, sco quai che Aaron Bellini declera concludend. «E lura è il giavisch era da pudair exponer animals ch'in chatschader n'ha forsa betg anc pudì schluppettar durant l'atgna carriera da chatscha. Sco per exempel – sper exponats d'animals plitost pli usitads sco il tshierv e la vulp – era forsa in grond capricorn ubain in taus.»

L'exposiziun speziala dal Museum Regiunal Savognin «ORIGIN & PASSIUN – La tgatscha grischuna an igl decurs digl taimp» avra sias portas ils 30 da zercladur 2026 en fin ils 25 da mars 2027.

Dapli infurmaziuns:
www.museumsavognin.ch.